



Radiotelevisiun
Svizra Rumantscha

Commentari

La refurma è a susta, però...

Isabelle Jaeger, manadra actualitad

Radiotelevisiun Svizra Rumantscha

Davart la lescha generala per la refurma dal territori dal Grischun

30-11-2014

Barbara Janom Steiner ha pudì avrir il schampagn oz. Pauc importa, sch'igl è uss ina refurma gronda ubain mo ina "refurmetta", sco quai ch'ins aveva crititgà. Finalmain è ella a susta.

Simpel n'èsi betg stà per Barbara Janom Steiner. Cun tractar la lescha correspudenta en il Cussegl grond è ella vegnida sut squitsch. Ins ha vesì in purtret rar: ina Barbara Janom Steiner plitost agitada, perfin gritta. Suentar il gea dal Cussegl grond hai dà resistenza en furma da dus referendums – il referendum dal pievel ed il referendum da las vischnancas. Ils observaturs eran sceptics. Anc curt avant la votaziun vegniv discutà, sche la refurma giaja tras insumma.

Ed uss è ella acceptada. Passa 33'000 Grischunas e Grischuns han ditg gea. La PCD giuvna na era la fin dals quints gnanca buna da persvader l'entira Surselva, ed er il na da l'Engiadin'Ota è pli da bass che quai ch'ins avess pudì presumar.

Barbara Janom Steiner lauda oz la voluntad dal suveran da guardar vers l'avegnir. Là spetga però anc in'otra sfida: fusiunar ils vitgs. La regenta di bain che la voluntad da fusiunar stoppia vegnir da sut ensi. Facticamain na vegn a vegnir il squitsch da fusiunar garanti betg pli pitschen entras la decisiun dad oz.